



Број/Број: 03-/4-50-1-10-32-15/10
Сарајево/Сарајево: 9. 3. 2010. године

Z A P I S N I K

32. sjednice Zajedničke komisije za evropske integracije Parlamentarne skupštine BiH

Sjednica je održana 9. 3. 2010., s početkom u 10 sati.

Sjednici su prisustvovali članovi Komisije: Halid Genjac, predsjedavajući, Ivo Miro Jović, prvi zamjenik predsjedavajućeg, Drago Ljubičić, drugi zamjenik predsjedavajućeg, te Branko Dokić, Alma Čolo, Šemsudin Mehmedović i Milica Marković.

Zoran Koprivica, Božo Ljubić, Hilmo Neimarlija, Selim Bešlagić i Azra Hadžiahmetović opravdali su odsustvo.

Sjednici su još prisustvovali: Suad Musić, zamjenik koordinatora za reformu javne uprave, Amela Alihodžić, pomoćnik direktora Direkcije za evropske integracije BiH, te Vehar Primož, vođa tima projekta podrške Bosni i Hercegovini u procesu evropskih integracija i koordinacije pomoći Evropske zajednice. Sjednici su prisustvovali i predstavnici Misije OSCE-a u BiH, kao i predstavnici medija.

Prisustvovala su i Vlatka Dangubić, sekretar Komisije, i Vladana Lučić, stručni saradnik u Komisiji.

Komisija je jednoglasno usvojila sljedeći

D N E V N I R E D

1. Usvajanje zapisnika 30. i 31. sjednice Komisije;
2. Razmatranje Prijedloga zakona o izmjenama i dopunama Zakona o klasifikaciji djelatnosti u Bosni i Hercegovini, druga komisijska faza u skladu s članom 110. Poslovnika Predstavničkog doma i članom 104. Poslovnika Doma naroda PSBiH;
3. Praćenje napretka reforme javne uprave u BiH;
Uvodno izlaganje: Suad Musić, zamjenik koordinatora za reformu javne uprave;

4. Predstavljanje EU projekata tehničke pomoći DEI sa osvrtom na proces pravne harmonizacije i koordinacije poslova EU u BiH;
Uvodno izlaganje: Primož Vehar, vođa tima projekta koji finansira EU;
5. Usvajanje Izvještaja o radu Komisije za 2009. godinu;
6. Tekuća pitanja;

Ad. 1. Usvajanje zapisnika 30. i 31. sjednice Komisije

Nakon što je jednoglasno usvojen dnevni red, prisutni članovi jednoglasno su usvojili zapisnike 30. i 31. sjednice Komisije.

Ad. 2. Razmatranje Prijedloga zakona o izmjenama i dopunama Zakona o klasifikaciji djelatnosti u Bosni i Hercegovini, druga komisijska faza u skladu s članom 110. Poslovnika Predstavničkog doma i članom 104. Poslovnika Doma naroda PSBiH

Nakon uvodnog izlaganja predsjedavajućeg Komisije, razmatran je Prijedlog zakona o izmjeni Zakona o klasifikaciji djelatnosti u Bosni i Hercegovini u drugoj komisijskoj fazi nakon čega je jednoglasno odlučeno da se predsjedavajućem Predstavničkog doma Parlamentarne skupštine BiH i predsjedavajućem Doma naroda Parlamentarne skupštine BiH dostavi sljedeći

I Z V J E Š T A J **o Prijedlogu zakona o izmjeni Zakona o klasifikaciji djelatnosti u** **Bosni i Hercegovini**

Prijedlog zakona o izmjeni Zakona o klasifikaciji djelatnosti u Bosni i Hercegovini usvojen je u prvom čitanju na 70. sjednici Predstavničkog doma, održanoj 21. 2. 2010., i 43. sjednici Doma naroda, održanoj 23. 2. 2010. godine.

Zajednička komisija je, u svojstvu nadležne komisije, na 32. sjednici, održanoj 9. 2. 2010., razmatrala Prijedlog zakona u drugoj komisijskoj fazi. Konstatirano je da na Prijedlog zakona, u roku utvrđenom poslovnicama, nije uložena nijedan amandman.

Zajednička komisija je, nakon obavljene rasprave, jednoglasno prihvatila Prijedlog zakona u predloženom tekstu te konstatirala da je Zakon neophodno donijeti i predlaže Predstavničkom domu PSBiH i Domu naroda PSBiH njegovo usvajanje.

U skladu s članom 107. Poslovnika Doma naroda, za izvjestioca na sjednici Doma naroda imenovan je Ivo Miro Jović.

U skladu s članom 113. Poslovnika Predstavničkog doma PSBiH, za izvjestioca na sjednici Predstavničkog doma imenovan je Halid Genjac.

Ad. 3. Praćenje napretka reforme javne uprave u BiH

U uvodnom izlaganju Suad Musić, zamjenik koordinatora za reformu javne uprave, predstavio je strategiju reforme javne uprave (RJU) i trenutnu situaciju u procesu reforme. Vizija strategije RJU je stvaranje efikasne, profesionalne i odgovorne uprave u funkciji građana i društveno-ekonomskog razvoja sposobne da podrži i nosi proces integriranja BiH u EU. Suad Musić govorio je o problemima s kojima se susreću u realizaciji strategije i naglasio je da je potrebno promovirati i podržati postojeći proces RJU kao kritičnu tačku uspješnog procesa integriranja, podržati razvoj plana za institucionalnu izgradnju po *acquisu* i animirati finansijsku podršku fondu RJU i iz domaćih izvora.

U raspravi koja je uslijedila istaknuto je da, pored brojnih problema u procesu RJU, teškoću predstavlja i to što nije razvijen mehanizam za mjerenje učinka reforme, te je Komisija jednoglasno usvojila sljedeći zaključak:

Komisija prihvata Izvještaj o reformi javne uprave i poziva Ured koordinatora za reformu javne uprave da Komisiji redovno, tromjesečno, podnosi izvještaje o napretku u oblasti svog djelovanja.

Ad. 4. Predstavljanje EU projekata tehničke pomoći DEI sa osvrtom na proces pravne harmonizacije i koordinacije EU poslova u BiH

Primož Vehar predstavio je projekat koji finansira EU, a koji je namijenjen Vijeću ministara BiH, odnosno Direkciji za evropske integracije BiH. Predviđeno trajanje projekta je dvije godine. Na projektu su, osim Primoža Vehara, vođe tima, angažirani i eksperti iz regije, Litvanije i Estonije. Uzimajući u obzir odlučujuću ulogu Parlamenta u procesu harmonizacije i potvrđivanja usklađenosti zakonodavstva sa *acquisem*, gosp. Vehar iznio je svoju namjeru da u projekat uključi i Parlamenarnu skupštinu BiH, koja će na osnovu dosadašnjeg iskustva učestvovati u određivanju načina usklađivanja.

Članovi Komisije su sa zadovoljstvom prihvatili učešće u ovom projektu i dogovoreno je da gosp. Vehar pripremi prijedlog buduće saradnje.

Ad. 5. Usvajanje Izvještaja o radu Komisije za 2009. godinu

Izvještaj o radu Komisije za 2009. godinu jednoglasno je usvojen uz primjedbu Ive Mire Jovića da se u Izvještaju daju kratke napomene o svakoj međunarodnoj aktivnosti navedenoj u Izvještaju.

Sjednica je završena u 12 sati.

Predsjedavajući
Zajedničke komisije
Halid Genjac

